

ЗОЯ СЕМЕНДУЕВА



**УЧИТЕЛЬ**

Махачкала, Дагучпедгиз, 1981



ЗОЯ СЕМЕНДУЕВА



# УЧИТЕЛЬ

Махачкала, 1981, Дагучпедгиз

Семендуева Зоя  
С 30 Учитель. Стихигьо. Махачкала,  
Дагучпедгиз, 1981 г  
56 с.  
Учитель. Стихи.

ББК. 84. Тат  
с (Тат)



Э шогъиригьой хуьшде Зоя Семендуева бирмундени пушотеине зубуне дивэглгьоре, домундетгьоре те имогьоиш э глэрей екем пес мунде одомигьо, гьеймогьоине хушбэхди эн угьоре, тэгрифменд сохдени тозе девр жовонгьоре, дусди хэлгь советире.

Э и сборник дешенте омори гьемчуьн еки эз песини шогъиригьой энупоэма «Духдер дуь бөбе», э комики бирмунде оморени дусди эн дуь миллетгьо.

Рецензент: Н. Гилядов

С  $\frac{763-36}{M 124 [03]-81}$  70-81

© Дагучпедгиз, 1981.

# СТИХИГЪО





### УЧИТЕЛЬ

Деде мере эз гьул гуърде,  
Берде у но эри хунде.  
Имуш бирим руе вози,  
Шоримушки—гъэдерсуъзи.

Учителыш деш эшгъ мидо,  
Гьеммише бу шоре ловгьо.  
Гьемме мяхосд гъэзиз уре,  
Хуб мивомухд нубогьоре.

Е руз сергъуз у диримо,  
Э гьеммейму хуб чум доно,  
У э хуьшде омбор домунд  
Гуйге дуьл юш бу лап гурунд.

У зиёди гоф не гуфди,  
Хуб э ёр ме измуш мунди.  
«Довгю, довгю!—гуфди бирден.—  
Дес кешири беде дуьшмен...»

Гьеммеeki мундим мэхьтел,  
Чум донорим э учитель.  
Гене гуфди у эз иму:  
«Мидорим Ватане эйшму».

Гирошд чор сал хуни ве глэрс,  
Хилос бисдо кэлгъгьо эз лерз.  
Игидгьойму руе хуне  
Вогошденуът дусдгьо гене.

Учителе глэиллегьо  
Миовурдут э ёр гьер бо.  
Имугьоиш чигьрет энугь  
Оморени э пушойму.

Имугьойле бирем деде,  
Балаймеш гьисд эри хунде.  
Нис воисде эри дире  
Учителе сергьуз бире.

### **АСТАРЕЙМЕ**

Э ёр мени, э глэили,  
Келетегьо мигуфдируът:  
Э ю хумне, э одоми,  
Астарегьой асму веруът,

Э у гофгьо сохде бовор,  
Астарепок бире шевгьо,  
Мигешдуъм ме уре омбор,  
Астарейме нисд э гьово.

Оммо мохурдшев-руз э ме  
Е астаре э руй хори,  
Товуш мидо, тегьер чуьшме.  
Эри гьемме у мозоли.

Эжеш мере гьисмет бердгё,  
Э коми куьнж эн вилеет,  
Астарей ме эз Кремля  
Мидуь мере эшигь ве муьгьбет.

## ИНСОНГЬО

Зигьисденим, бейхэбер вэхд гирошде,  
Метлебгьоре пэхьни э дуьл сэхд дошде.  
Оммо уьлуьм кей омогеш гъэришу,  
У рэхьмедуьл эри екиш нибошу.  
Энжэгь увэхд дуьл эн гьемме сүхдени,  
Кейки бивэхд хун жовонгьо рихдени,  
Кейки глэил э гъэл деде хэндүьсде,  
Песде гьердүь эз бомб дүьшме беисде.  
Глуьмуьр инсон дураз нисдгеш зиёдте,  
Эйчуь уьлуьм шев-руз уре терсунде?  
Чуьтам гьони сокит мибу дуьл деде?  
Довглохогьиш хуьшдению гьисд бенде.  
Ме, чуьн деде, эдем хосде, инсонгьо,  
Темиз бугу эвр эн хори ве гьово.  
Эжигей туп ве виз нолей косодгьо,  
Шиновим сес хуше овоз мэгнигьо.

## Э СЕР ГЬОВРЕГЬОЙ ПИСКАРЁВ Э ЛЕНИНГРАД

Инжо поисди дердименд е деде  
Ве эри ферзендгьо эдее гирисде.  
Парталгьо вокурди гьеммере сиегьи  
Уре диремунде сохденуьм глэрс тигьи.

Гуйге у гуьрд сохди дерд ве гъэм хэлгьгьоре,  
Э гъэд дуьл эн хуьшде донори угьоре.  
Э жигей гъэмлуье дедегьо э дуьньёгь,  
Ёс гуьрде согь глуьмуьр, сохдени у гирё.

Гьоврегьош э инжо гъэдерсуьз омборуьт.  
Э жигей эн воруш глэрс эз чум рихденуьт.  
Э тегьер палутдор, у дедей муьхькеми.  
Дердгьоре гьеммере э гьечи тоб дори.

О дедей! Омборе гъззобгьо туь дирей.  
Четине рузгьореш кем эз сер не сохдей.  
Яралуьш туь бирей, хун туьре рихунде.  
Увэхди ниофди лугъэй нун эй хурде.

Э инжо гъоврегьо диренуьм ченд жерге.  
Мигуиге гьеммешу офдорет эз ерге.  
О дедей! Овлодгьо сессуьзуьт иглэре,  
Туьш гирё сохдени, сэхд гуьрде лэглэре.

Шиновит, шиновит инсонгьой эн дуьньёгь!  
Хун рихди э инжо э тегьер эн дерьёгь.  
У салгьой блокада э шегьер эн Ленин  
Жоборди бурмунд хэлгь, бугеш лап четин.

Омборе салгьошки эз увэхд гирошдет.  
Гъоврегьой Пискарёв едигор вэхд мундет.  
Ки инжо омогеш э тегьер эн деде  
Тоб нидуь энугь глэрсгьой чум не рихде.

Гьер дугь глэрс дедегьогь бигьил бу чуйн нештер,  
Эри эн довглохогь ве дуьшмен эни девр.  
Де элов эн довгло луьп зере не суху  
Тэхсирсуьз жовонгьогь, бишэглр чуй соху?

### **НИС ВОИСДЕ МЕРЕ ДИЕ**

Нис воисде мере дие  
Товуше руз думонлуь бу,  
Дедегьоре гъэмлуь дирэ  
Ве э глуьлом жевгь офдону.

Нис воисде мере дие  
Хори, асму глэтош гуьруь,  
Муьгьбетлуьгьогь журо бирэ,  
Бошут угьогь дердлуь, гъэмлуь.

Нис воисде мере дие  
Гэиллегьо езугъ бошут,  
Гуърде вэгдо нум бебере,  
Хьэсрот бире, ох вокошут.

Нис воисде мере дие  
Жовонгьойму фурмуш сохут:  
Энжэгъ дусди, еклуйгире  
Беде дуьшмеш хуърд нисоху.

### ШЕКУЪЛ БЕБЕ

Мигьревуне чумгьой деде  
Эз сер те пой эн кук хуьшде,  
Денишире хуб фегьм сохде,  
Гуйге дири уре суьфде.

Э пушой ю оморени,  
Э дэгъдэгъэй эн жейлеи,  
Чуьтам шуьвер гэилире  
Ю э довгю рэхь сохдиге,

Деде-хэгьер, ширине ёр  
Ёси бируьт, чумгьошуш тор.  
Гуйге думон шиширебу,  
Ковре асму веди небу.

Э дуьл гьемме дебу шивен.  
Эн ки бу кук, эн ки шуьвер.  
Гьэл мигуьрдуьт, моч мисохдуьт:  
«Шор вогордош!»—мигүфдируьт.

Домор биреш е сал небу,  
Гьич эвлде не диребу.  
У сал бири кук эз деде,  
Недири у гьужогъ бебе.

Тегьер чендгьо, э келе женг  
Дуьшменгьоре дори у мерг.  
Э гъэд глэтош уш домунди,  
Эри Ватан хун рихунди.

Бисд сал глүьмуьр жовонире  
У бэхшири кук хуьшдере.  
Келе сохде веровунди,  
Гъич хьижрони не бирмунди.

—Эйчуь бирей гъэргъ туь, дедей?  
Бегем мере суьфде дирей?  
Гъэрд эвлоди эри рафде,  
Гъэлхэнд Ватан эй поисде.

Дуьл эн деде бисдо гурунд,  
Похли-похли у глэрс рихунд.  
Кук диренге хьол дедере,  
Сер гуьрдени эй дуьл доре.

—Мегирис туь, гьирке месох.  
Шовглой мере туь гьобул сох:  
Верзирени э жофой туь  
Миведиром, бош имидлуть.

—Ме сохденуьм э туь бовор.  
Дуьл дедере сохош туь шор!  
Бура глэзиз, шекуьл бебел  
Туьни эзуш жовон гьеле.

Войгей деде энжэгъ уни:  
Э и глүьлом бу шолуми.  
Чуьн туьнигьо, глэзиз деде,  
Нике рузгьо винуьт гене.

• • •

Духдер догъум, войгелуьнуьм,  
Туьре, гъуш догъ, сэхд хосденуьм  
Э дургъо туь гъэнет зере,  
Бер унжиге муьгъбет мере.

Бисдориге туь э серхъэд.  
Тегьер эн мерд, бош гъиномерд  
Мибу кумег муьгъбет дусди.  
Эй ту игид Ватан—расди.

Енебуге зере гъугъэр,  
Жэхъди сохде эри бегьер,  
Э унжигеш муьгъбет иму,  
Хъэвес мидуь, кумег мибу.

Э гьержоиш туь бисдори,  
Дан, севгили, туьре ёри.  
Туьни войгей дуьл духдери,  
Э и Ватан бэхдевери.

## НЕСИГИЭТ ДЕДЕ

Дануьсденуьм туь,  
    кук ме, гъисд гъээизи.  
Дедей миё эз эвлод бу сэхд рази.  
Игид Ватан кук бисдоге гъисд мозол,  
Хурде шириш э туь мибу ниш-хъэллол.

Тейте туьре келе сохде дуьл деде  
Михосд лово: невини дерд, довго де.  
Дан туь гъэдуьр шолумире имбуруз,  
Хэлгъьо дие небу дердлуь, серегъуз.

Э глүьмуьр туь бисди зиёд расирей.  
Руй бебере туь, глзил ме, недирей.  
Согь могошдге мидо туьре несиглэт.  
Дедей норе эри туь рэхь исэглэт.

Тегьер дедей, ширдор бала Ватани.  
Гьич вэхд эзу журо бире нидани.  
У гьем гьувот, гьеми эшгьи эй игид.  
Э гьер женггьо э Ватан бош туь имид.

Дануьсденуьм туь, кук ме, гьисд глэзизи.  
Дедей мие эз эвлод бу сэхд рази.  
Игид Ватан кук бисдоге гьисд мозол,  
Хурде шириш э туь мибу ниш-хьэллол.

## **БИРЕНУЪТ БЕБЕГЪОШ**

### **1.**

Вэхд довгlo бу, гьизгьин эн женг.  
Шев торик бу, невебу менг.  
Миомо сес ноле ве виз,  
Глэтош эн туп микеши риз.  
Гуьрдет э бенд чор эйлонме,  
Имуре берд есир дуьшме.  
Зэхьм эн яра мидо сэхд дорд,  
Дуьшмен сурул, тегьер жоллод,  
Сохдембу гуж э есиргьо,  
Десдей «эсэс» эн нэмцигьо.  
Кумег бире дуь эеки,  
Е ченд милет: урус, лезги...  
Меш ки бируьм тэхьно е тат,  
Бироргьойме бируьт ченд сад.  
Бисдорим гуьрд десде-десде,  
Вирихденим иму песде.

Ченд улкегьой Европаре  
Гешдейм иму, чуьн оворе.  
Гогь э Франц, гогь э Дани  
Сохдейм иму партизани.  
Мибердим женг желд-борембор,  
Бирим эйшу тегьер бирор.  
Эй гьемме бу дуьшме еки:  
Фашист-хунхур, жинс эн сеги.  
Оммо э дуьл Ватан дебу,  
Бирим омбор хьэсрет энугь.  
Верасд довго. Асму вокурд.  
Ферзэндгьоре Ватан вохурд.  
Динже жофо ве ободи  
Эри иму сэхд мироди.

## 2.

Шохьонгум бу. Куфдут дере.  
Вокурденуьт дер хунере,  
Э домой дер е пире мерд  
Сергьуз, гложиз, сэхьиб сад дерд,  
Чуькле шелей тумореи  
Э дес эни езугь дери,  
Фамилере ве нум мере  
Чуьтам гьисди гуфди э ме.  
Мэхьтел мундум: ки миё бу,  
Гьечи мере хуб шиноху?!  
Теклиф сохдум ме э хуне,  
Сифет мерд до бегьем гуне.  
Э фикир ме гешд ченд хэёл,  
Дуьл инсони гоф сохде лол:  
... Жогьиле вэхд дедейму муьрд,  
Бебейму зен тозе вегуьрд.  
Ме увэхди бируьм гьеле  
Пенж-шеш сале, лап чуьклеле.  
Зенбебейму, тегьер уге,  
Мере нихосд эйчуь буге.

Беймуш бу бегеме пуч.  
Микуфд, микүшд, мивоно гуж.  
Михурд, мигешд лап гээдерсуьз,  
Нимунд е руз гьич ичкусуьз.  
Гээгьр энуре эз ме михосд,  
Э пэхьники у чуьш мисохд.  
И гужгьоре тоб недоре,  
Гуфдиренуьм эри бебе.  
Хотур эн зен эй немунде,  
Беш эз гул мере гуьрде,  
Сургум сохде селт эз хуне  
Берде до э етимхоне.  
Суьфде шэхь зе дуьл ме унжо.  
Бегем бебе небу бижо?  
Мегьго, салгьо мигирошдгеш,  
Ниоморут гьич е гилеш.  
Чуьтам есир э гээриби.  
Хьэсрот Ватан сэхд бирени.  
Гьечу хьэсрот бебе бирем,  
Руй энуре гьич недирем.  
Бешуе етим бирем,  
Нун бешере гьич нэхурдем.  
Вегирд мере етимхоне...  
Инжо бири эй ме хуне,  
Инжо офдем бебе-деде,  
Ватан бири эйме гьемме.  
Бегем э ме лоигьини  
Э у сохум ме хогьини?  
Биремгеш ме эз Ватан дур,  
Дошдем номус ве гьем обур».

### 3.

... И фикиргьо э дуьл дери,  
И мердиш чум сэхд донори.  
Дуь одоми гээргээ хуно,  
Дерим иму э и хуне.

Нуйшуьнденуьм ме и мерде,  
Пуьрсиренуьм хьол ве дерде.  
Гофе сер гуьрд глэйб кешире,  
Охиш эз дуьл вокошире.  
У гоф мисохд, чуьн тэхсиркор,  
Гьер гоф мисохд э ме сэхд кор.  
Бирден поисд, песде гуфди:  
«Туь балай ме, мере гоф ди,  
Эз гофгьой ме бикеф нисдге  
Ве мере ёд нихуниге?  
Э сурогь туь омбор гешдем,  
Гозитгьоре хуб фегьм сохдем.  
Эз товун туь эхир хундум,  
Эз гьинор туь шори сохдум.  
Имугьойле офдем туьре,  
Воисд пиш сох туь бебере.  
Э пушой туь миофдонум,  
Туь вегирдэй эз ме ондум.  
Менуьм бебе изму гьэмлуь.  
Тек-тэхьюном пушой муьрде,  
Кес нисд митош эй вегуьрде».

Езугь омо мере омбор.  
Фикиргьой ме бисдо чен бор.  
Эз гьул бебе гьони гуьрдуьм,  
Э пой уре вэхизундум.  
Бугеш мере келе сабуьр,  
Суьфдеи бо ме э глутьмуьр,  
Гуфдируьм гоф шох э сифет:

—Чуьтам хунде мере ферзенд?  
Мере дошди Ватан Совет,  
Ме гьисдуьм кук келе кифлет.  
Туь бебеи, эижэгь бебе...  
Туь венорей э ме лербе.  
У лербе нисд эн вэхд довго  
Ве диремгьо четинигьо.

У лербере, бебе, э дуьл  
Туй венорей эй согъ глуймуьр.

Имугьойле э пире вэхд,  
Ме герекуьм бебере сэхд.  
Нэгл... Нисохум э туй езугъ.  
Бебе! Гуит э кук буйругъ!

### **О, ВАТАН МЕ!**

О, Ватан ме! Эри ме гу  
Эйчуь туйре дуьл хосдеге  
Сур нисдиге эй ме воку  
Чуьтам э дуьл гуьрдей жиге?

Белкем буьлбуьл руз эн васал,  
Хэненуйме э дор вери,  
Хундиге у эри Ватан  
Мугьумлуйе раче мэгни.

Белкем э ён эн гуйфере,  
Э хундеки дедей ненуй,  
Эри бала у гуйфдире:  
Туй эй Ватан веро хушруй.

Белкем бебе эз гуьл гуьрде,  
Гердундеки э сейл мере,  
Гьер тарафе у бурмунде,  
Ве Ватане хогъ гуйфдире.

Эзуни ми глээиз Ватан  
Ве э дуьлиш муьхькем нуьшди?  
Эри овлод, сэхд гьэдуьрдан,  
У эз гьер чиш зиёд гьисди.

## ГІЭЗИЗЕ ПАРТИЯ

Миллионгьо вегуьрдуйт ерэггэ,  
Рэхьбери туь сохди женг хэлггэ.  
Бейдогъиш дорембу уьшуьггэ,  
Э дес туь, гІэзизе партия.

Миллион дуьл дегесунд шэгІмеле,  
У элов Октябрь бу келе.  
У мунди эй хэлгггьо нишоне,  
Чуьн жоборд, гІэзизе партия.

Э у женг бебегьо овурдет,  
Хушбэхди, дуьлшори э кифлет.  
Бироруйт э иму гьер милет,  
Нигегьдор, гІэзизе партия.

Руз-беруз ободи овурде,  
Коммунизм эдейме вокурде.  
Имидлуй пушово туь берде,  
Товуш хэлгь, гІэзизе партия.

## ШЕГЬЕР ЛЕНИН

Шегьер Ленин— шегьер-игид,  
Э гьовхой туь хэлгь бу имид.  
Велг торихэ ченд вешенди,  
Унжо пури гьинорменди.

Эз ёр хэлгггьо гьич вэхд нирав  
Нуьгьимуьн руз мегь эн январь.  
Сес «Аврора» бисдо эйму  
Э женг Октябрь нишонбирму.

Келе довгІой эн Ватани,  
Э пушой чум гьисди гьони.

Эз буй барут женггьой гьовхо,  
Гьелеш темиз нисди гьово.

Гуйге тозе бине нори,  
Раче шегьер веромори  
Уш гьисд жофой игиде хэлгь,  
Глэлем Ленин доре рач шевгь.

### **ДОР Э СЕР БИЛОГЬ**

Чуьн гьэреул э сер билогь поисдей,  
Луьгегьоре э чор тараф лов сохдей.  
Савзе велггьо э гуш-гуши дебире,  
Дирегьоре эри еки гуфдире.

Духдерун догь э ён билогь оморе,  
Дуь эй еки дуьлгьошуре гуфдире.  
У гофгьоре гьеммере туь шинире,  
Дануьсдени пэхьни сохде сургьоре.

Соймишигьо э соей туь нуьшденуьт,  
Дуьлгьошуре унжо серин сохденуьт.  
Эй инсонгьо де у коргьо сур нисди,  
Эйтуь угьо чендгьэдериш хьуьрмети.

Кошдегор туь, гьелбетки дануьсди,  
Эри ники туьре инжо у кошди.  
Кини у мерд туьре инжо кошдегор?  
Е богьдори енебуге рэхьгигор.

Ки гьисдигеш никисохи у ёгьин,  
Унегуьре ме не бире гьич гьемин.  
Шоре мэгни эри туь, дор, хунденуьм,  
Кошдегоре эдей тэгриф доренуьм.

### Э СЕР ГЪОВРЕЙ ДЕДЕ

Э сер гъоврей туь поисде,  
Эй сес туь ме хъэсрот бире,  
Шевиш-рузиш суйгъде деде  
Туьре эдем огол зере.  
Эйчуь дедей, туь зу муьрди  
Э сал гуьмуьр не расире.  
Эйчуь гъечи езугъ гъишди,  
Эйки гуьом ме дерд мере.  
Дерд ферзенде энжэгъ деде,  
Дануьсдени вогу сохде.  
Оморей эй не вогошде,  
Балай туьре дердлуь гъишде.

### ХОГЪ ВАТАНЕ

Гъер инсоне васалиш гъисд поизиш,  
Гъеммишелуьг нисе бире гъич екиш.  
Эз ю бэгъдо гъер одоми нум гъишде,  
Э ю гуьре у нуме у вегирде

Беднумире эй вегирде четин нисд,  
Никисохэ гъеммишегъо хъуьрмет гъисд.  
Сох никире, нике нуме эй гъишде,  
Э негъогъи пуч несохде гъич вэхде.

Рузгъоймуре шевгъо дегиш сохденуьт,  
Рафде рузгъо вогогъруш нис биренуьт.  
Тэгъди сох туь коре пушо эй берде,  
Ненге инсон эз гуьмуьриш пес мунде.

Бирмун гъинор те поиз туь оmore,  
Э девр иму хъуьрмет гъисди жофоре.  
Эз дуьли хогъ туь гъеммише Ватане,  
Муьрде бэгъдош у гереки инсоне.

## НИСЕ МУЪРДЕ

Гирошдуйтгеш омбар салгьо,  
Чигърет эн кук фурмуш нибу.  
Те чумгьою хьэрзо гьисдгьо,  
Дедей куке гье мигешдуь.

Нидануь гьич дуьл эн деде,  
Е мэхэлиш сокит бире,  
Согь гьуьмуьр, ю лово хосде,  
Огол зере ферзенд юре.

Э хуней кук у лампере,  
Дегесунде хомуш мибу.  
Когъозгьой довгьoire  
Э ён лампе у михуну.

Эз гуниле офдонугьо,  
Нивэхизуь, сер тик гирде.  
Эри ватан жуне нуьгьо,  
Гьич е вэхдиш нисе муьрде.

Чигърет энугь гьеммишелуьг  
Эй хэлгь Ватан ве эй деде.  
Гьем гьуьзетлуь ве гьем буьзуьрг  
Едигор ве гьэзиз мунде.

## ЛОВОЙ ДЕДЕ

Гьетте гьенет муьхькем бире,  
Гьуш хьозури эй паруьсде.  
Гьишде лулей эн хуьшдере,  
У э дури гьэнет куфде.

Ферзендгьоймуш э гьечунуьт,  
Тегьер эн гьуш келе бире.  
Эз дедейгьо гуфдиренуьт:  
—Хьэлол сох туь э ме шире.

Э рэхь эдем ведарафде,  
Небу боши дедей гьэьгри,  
Биё офум рэхь эй хуьшде,  
Вэхд рафдей ме изму бири.

Дуьл эн деде гьелбет могьбул,  
Гьетте шинре мибу суьфде.  
Песде мибу у шоредуьл,  
Балай куке рач фегьм сохде.

Сер мигируь ловогьоре,  
Эй ферзенд эри хосде:  
—Бура, кук ме, рэхь шорире,  
Ватане туь э дуьл дошде.

Фурмуш месох хок хорире,  
Э коминжо келе бирей.  
Ве гьемчуьн у инсонгьоре  
Эз ки, жунме, эшгь вегирдей.

Э чуй жигеш бисдориге,  
Дан ки туь одомини.  
Коми рэхьэш туь рафдиге  
Инсоньети хьуьрмет туьни.

### **ВЭХД ЖОВОНИ**

Тегьер богьгьой эн васали,  
Гьечу рачи вэхд жовони.  
У гьисд васал зиндегуни,  
Ве биёвгьой эн инсони.

Бош туь жовон хосдей эн дуьл,  
Рачи ди туь тегьер эн гуьл.  
Ватан эз туь шори соху,  
Имид ёгьин э туь бесдуь.

Рэхьгой глутьмуьр лап омбари,  
Угьо зйтуь очмиш бири.  
Хубе рэхэ дан туь вихде  
Э дузе рэхь ёгьин рафде.

Увэхд мофи мозол ве бэхд,  
Рузгьош мибу зйтуь хушбэхд.  
Мидани туь офде софо,  
Ве тэгрифи э гээд жофо.

### **МЕРЕ ХЬЭЗ ОМОРЕ**

Мере хьэз оmore денишире,  
Раче чигьрет догьгоймуре.  
Электриш ишуьгь доре,  
Чуьн астарай эн зум-зумье.

Мере хьэз оmore денишире,  
Чуьтам васал, эз глэрей догьгьо  
Шэх-шэх рихде нуькерегьо,  
Вараюсдет эз гуьл доргьо.

Э гешдеки жовонгьоре,  
Мере хьэз оmore денишире,  
Э жилгьэгьой глэрей догьгьо,  
Шоре муьгьбет пур э дуьлгьо.

## ДУСД

Дусд эри инсон гьисди мелхьэм,  
Дусд бугьо инсон никешуь гьэм.  
Э дусд бугьо жиге нибоши ёд,  
Хьуьрметиш унжо мибошу зиёд.  
Дусдсуьз парандегьош низенуьт гьич пар,  
Бигьил бошут э гьер жиге дусдгьо омбар.  
Дусди гьэнет инсони, дусди гьуьмуьр жунуи,  
Дусдсуьз гироруьтгьо рузгьо эри чуьни?  
Дусдире гьувот дим бироргьо,  
Нисд гердо эз гьуьлом дуьшменигьо.  
Эри дусдгьо очугьи дергьойму гьер вэхд,  
Эри нэхогьгьо гьопугьош гьисдуьт сэхд.

## ШЕЙ СЕБЭХЬИ

Похли-похли, гьэрсе хуно,  
Белгьэм гирде велг, савзере.  
Шей себэхьи уьшуьгь мидо,  
У шон чуьшме ригаз доре.

Жун гуьл, савзе тозе бире,  
Хурде хурек шей себэхьи.  
Хуьрд сохденуьт тешнеире...  
Мереш э у лап темэхьи.

Ме себэхьгьо диренуьмге,  
Э сер савзе шей нуьшдеи,  
Гуйге угьо чум ёриге  
Ве пуруьтге эшгь хосдеи.

Шей себэхьи, туьни темиз,  
Э хумнейтуь гоф гешденуьм.  
Мэгьгнолуь бошут гьер риз,  
Хурег хэлгь бу—ме хосденуьм.

## ВАСАЛ Э ДОГЪГО

Тегьер гуьзел гуьзелго,  
Геймиш тегьер глэруьсго,  
Сес юш тегьер мугъумго,  
Гьечи васал оmore,  
Догълуйгьоре эшгь доре.

Эз гьер тараф эн догъго  
Пур рихденуьт чойлего,  
Рачуьт сес шэх-шэхэго,  
Гьечи васал оmore,  
Догълуйгьоре эшгь доре.

Жовонгьойму рач гьуше  
Эдет хунде, вежесде.  
Гуьлгьош э дес ченд десде,  
Ини васал омори,  
Догълуйгьоре эшгь дори.

## ФУРМУШ НИСЕ СОХДЕ

Э г л у ь з е т С. Изгияев

Чуь зу рафди эз кин иму,  
Туь имуре гьишди пешму.  
Бегем шогьир гьич муьрдени,  
У ки хэлгээ дусд хосдени.

Пуьмуьр комос эйчуь биё,  
Бурав хубго эзи дуьньёгь.  
Бегем усдош вир бирени,  
Шогьир усдой эн гофини.

Эй шолуми ве эй дусди,  
Дестонгьой туь кумег гьисди.  
Бегем дусдхогь фурмуш бире,  
У э дуьлгьо гье дебире.

Гэзизе кук эн хэлгь бири,  
Хэлгэ туь лап хосдембири,  
Бегем хэлгьхогь, хэлгэ гьишде,  
Мирав эри не вогошде.

Э сер лэглэ мугьум вери,  
Э хундеки шоре мэгни.  
Эйчуь биё эз кор пою,  
Дуьл мэгнихун кор не соху.

Нимелитуьт у дестонгьо,  
Туь нуьвуйсде сер гирдейгьо.  
Гене угьо гьич нимуьруьт,  
Гьеммишелуьг гье мизигуьт.

Нум эн шогьир гьисди одлуь,  
Хэлгьиш э у гьисд имидлуь.  
Шогьире хэлгь гээиз дошде,  
Гьич вэхд фурмуш нисе сохде.

### **ГЪИСМЕТ ДУХДЕР**

Духдер догьум, ме кеширем дерд гээзоб,  
Тегьер эн гьуш э гээд гьэфес дорем тоб.  
Ме лол бируьм, ихдиёрсуьз эй жугьоб,  
Пушотегьо гьисмет духдер бу гьечи.

Бебе-деш дерд михундут эришу,  
Тозе гээил духдериге бу пешму.  
Эвлод нихунд денилере эришу,  
Пушотегьо гьисмет духдер бу гьечи.

Мигуфдируът нис гуьнжуьсде э духдер,  
Бурав хуну, дананию бу звер.  
Мигьшд уре эз кор гӱьлом бейхэбер,  
Пушотегьо гьисмет духдер бу гьечи.

Гоф духдере буёгь нигурд келете,  
Нидануьсдуът гьэдуьр дусди муьгьбете.  
Нивотову соки ишу гьирьете,  
Пушотегьо гьисмет духдер бу гьечи.

Мигуиге эри парче бу совдо,  
Мифурухдут духдергьоре, мивосдо.  
Рази бируът дуьруьжде пул ки мидо,  
Пушотегьо гьисмет духдер бу гьечи.

Нипуьрсируът разименди духдере,  
Минкин небу винуь ебо доморе.  
Огьил буге пул омборте восдоре,  
Пушотегьо гьисмет духдер бу гьечи.

Нивинируът екиш чумгьой гӱэрсире,  
Тегьер лигьоб мигьшд перде кешире,  
Мигуиге эдей берде ёсире,  
Пушотегьо гьисмет духдер бу гьечи.

Эй екигьо имбуруз бу гӱэруьси;  
Гогь сес гьовол, гогь сес ошугь ве сази,  
Энжэгь гӱэруьс дердименд бу бирази  
Пушотегьо гьисмет духдер бу гьечи.

Согьэ гӱьмуьр э зир кели ве тевер,  
Э зир эн муьрс ве серкуши эн шуьвер.  
Мидомундим лов заруьнжи, жон хэгьер,  
Пушотегьо гьисмет духдер бу гьечи.

Темиз бисдо эвр эн гьово селт бирден,  
Эз зир эн муьрс хилос бири гьони зен.

Дие нибу лов заруьнжи, дердименд.  
Мизоллуньни гъисмет духдер э и девр.

Нисд сенигӀэт гъони зенгъо не хунде,  
Э гьер коргъо гъинорменди бирмунде.  
Гуълишоне зиндегуни вокурде.  
Мозоллуньни гъисмет духдер э и девр.

Тегьер деде шолумире хосдени,  
Тегьер духдер дусдире сэхд дошдени.  
Тегьер эвлод Ватане у хосдени,  
Мозоллуньни гъисмет духдер э и девр.

### **О, ДЕДЕЙ**

О, дедей, тегьер суьрх э пембе,  
Э гъечу мидошди ферзенде.  
Кеме шев туь ховсуьз не мундей,  
Те себэхь ненуйгъо туь хундей.

О, дедей, бири вэхд четини,  
Э хуьшде хорундей хъижрони.  
Имуре негъишде туь гисне,  
Мидошди э герми эн сине.

О, дедей, серлеш дорд мидоге,  
Э хьэлов нечогъи миофдоге,  
Хуьшдере э гьер ло мизери,  
Чоресох баларе миофди.

«О, дедей!»—кимигъо гуфдире,  
Э дуьл ю е гоф-чи оmore.  
Лап омбор гешденуьт дедере,  
Вокурде, бэхш сохут дардгьоре.

О, дедей, ченд эвлод туь гьйшдей,  
Гьемере э е чум туь дошдей.  
Песг эйчуь балагьо имбуруз,  
Кимигьо э шир туь нисдуьт дуз?..

### **ПЕШМУНИ**

Э гїэили недан бируьм,  
Э гьэвл гїуьлом недебируьм.  
Ве э гьэдуьр бебе-деде,  
Недебируьм увэхд гьеле.

Оммо угьо шев те себэхь.  
Эри эвлод бируьт чумрэхь.  
Шевгьо ховсуьз кем нимундуьт,  
Хэсде бире эз дерд-думут.

Имогьойле келе бирем,  
Э метлебгьош ме расирем.  
Кеширенуьм ме пешмуни,  
Эйчуь нисдуьм гїэил гьони.

Бошум кумег бебе-деде,  
Зевр гируьм ме хьуьрмете.  
Эжеит ишму, бебе-деде,  
Вогордунум гьэрд эвлоче.

### **ЭРИ ДЕРБЕНД**

Эри туь хунденуьм мэгнире,  
Тэгриф доренуьм дусдире.  
Туь гьисди, чунь шегьер, гьэдими,  
Эри ме чуьн Ватан гїэили.

Э тегьер эн сэнгъгой садсали,  
Тоб дори хэлгъ зурбо четини.  
Могъбули ве глэзоб бу гъисмет,  
Нике руз, товуши бу ниет.

И шасд сал зиёди азадим,  
Хубе руз эдее диреним.  
Пушоте туь бири шегьер дерд,  
Имогъой гуьллуь богъ гъисд Дербенд.

Кучегъо геймишуьт, чуьн синбогъ,  
Эвир ю темизи, чуьн ейлогъ.  
Хэлгъгойюш зеки бироруьт,  
Гъемиге мозолменд, дуьлшоруьт.

Эри туь хунденуьм мэгнире,  
Тэгрифи доренуьм дусдире.  
Туь гъисди, чуьн шегьер, гъэдими,  
Эри ме чуьн Ватан глэили.

### **ЗИМИСДУ НЕ ВАСАЛ**

Зимисду, сэхд гъэгър вечире,  
Бесдебу рэхъ эн васале.  
Тегьер бурме тик пичире,  
Вэхуьшдебу кулок-зуьгъбе.

Хуьърш зимисду кем-кем поисд,  
Зуьгъбей кулок хомуш бисдо.  
Хьэл бисдо верф, хиникиш нисд.  
Асму очугъ, вокурд офдо.

Эжигей верф гуьлгъой доргъо  
Сипре ранге гъобул сохдуьт.  
Беде дуьлгъо бирегоргъо  
Э зимисду ухшешинуьт.

## ГІЭЗИЗЕ ХОРИМЕ

Хорире—ме ватан хунденуым.  
Хорире, чуьн деде, хосденуым.  
Хорире сохденим рач геймиш,  
Э тегьер эн глэруьс безетмиш.

Хорини эриму берекет.  
Хорини шогьод девр ве муьгьбет.  
Имуре у хьэсуьл овурди.  
Хьисобсуьз инсонгьош суьперди.

О, хори, гьувот туь зурбои.  
О, хори, гьуьмуьр туь омбори.  
Хосденуым ек бошим э гьувот.  
Гьуьмуьриш дураз бу эн эвлод.

Инсонгьо, хоятгьо ободи,  
Нигьилуьт бу э гьуьлом беде,  
Яралуь бу хори эз бомбгьо,  
Пуч бошут шегьергьо ве хэлггьо.

## ГІЭРУЬС УРУСИ

Дедей мисохд гузет куке,  
Мишуморд у руз-сэглэте,  
Кей мерасуь хундеире,  
Мивегируь аттестате.

Оммо кукиш верасденге,  
Эри хуьшде сохд ю фикир.  
Эй вегуьрде сениглэте.  
Бурав зуте, небире дир.

Э дуьл дедей дебу мирод,  
Эз кук пэхьни у дошдембу,

Воисдембу теке эвлод,  
Эз ю дие журу небу.

Бирден е руз нике хэбер,  
До э дедей, шори сохде:  
— Эри бире ме инженер,  
Рафденинуым эри хунде.

Гъеми шори, гъеми гъирке,  
Мисохд дедей шиниренге,  
Гъэл гуьрд, моч сохд кук хуьшдере  
Де гоф не офд эй гуфдире.

Вэхд гиросд зу. Се сал бисдо.  
Е руз когъоз омо эзу,  
Е дегъоре вегуьрд гъэдо,  
Рафд эй хунде э гъунши зу.

Бэгъдовой эн е ченд гофгъо,  
Нуьвуйсдигъо эри деде,  
Духдер гъунши лэгъэ гъово,  
Гуйге бисдо зугъун гуьрде.

Зениш мэхьтел бисдо бирден.  
Эз нокуми чуй бисдо бу?  
Эз же омо инжо садан?  
— Чуй нуьвуйсди э когъоз у?

«... Хундеире верасденге,  
Ниём тэхьно руе хуне.  
Дедей, мере гъисди войге:  
Инжо эдем зен хосде ме».

Дуьл эн деде бирени хуьрд.  
Дедей бисдо дерди-ёси,  
Эз гъуьломиш у дес вегуьрд.  
Кук нисоху де гъэруьси.

Герме рузгьой гьеминон бу.  
Чемодане э дес гуърде.  
Е духделе оморебу,  
Гэйбе-гэйб у дере куде.

И келе зен дере вокурд.  
Духдериш до э у когъоз,  
Э кин гъунши гене у хунд,  
Песде вогошд э уревоз.

— ЕгӀни и гьисд вокурдегор,—  
Э сер венгесд духдер гъунши.  
Инженери мисоху кор,  
Воисдени бу кирочи.

Эй ехмиш дуълверовун,  
Хьисоб сохде, рази бисдо.  
Ве екиге э у товун,  
Когъоз куки э дес дегьо.

Гирошденуът рузгьо, мегьгьо,  
Шинохденуът дуь екире.  
— Мереш гьисди туьре хуно  
Э Саратов пире деде.

Эгер суьфде кемихьдибор  
Сохдембуге э у деде,  
Синемииш мисохд омбор,  
Песде дуьл динж бисдо деде.

Гоф нигуфди де зиёди,  
Омбор мигуьрд хьуьрмет зене.  
Кор хунереш у мивини,  
«Мама» уре огол мизе.

Дедей мисохд эзу шори  
Ве мигуфди эри хуьшде:

«Миомоге кук ме зури,  
Нигьшдуйм гьич кесе хосде».

Омо у руз. Кукиш вогошд,  
Мивинуй зен кук тэхьной,  
Эз дуьл деде шори гирошд,  
Кук э гьечи оморей.

Сабуьр сохде, песде пуьрси:  
—Эхи кук ме туь зен хосдей,  
Гуйге юш бу зен уруси,  
Песг туь уре не овурдей?

Э ловгьой кук верафд хэнде,  
Дедере сэхд гьэл гуьрде.  
— У омори эз ме зуте,  
Ини глэруьс э хуне де.

— Шори мере нисди гьэдер!  
Эз дуьли ме гьисди глэруьс.  
Гердойт ишму деш бэхдевер!  
У жун мени, духдер урус.

### **ВОЙГЕЙ ДУЬЛ**

Войгегьо, войгегьо,  
ишмунит хьисобсуьз:  
Хосденуьм асмуре  
ме винуьм домонсуьз,  
Чуьшмере ве менге  
зеки бэхьс гуьрде,  
Гуьлومه оводу  
э гьер ло вокурде.  
Э пушой дерьёгьго  
белкем ме дугь гловуьм,  
Э тегьер е чуькле  
астарей асмунуьм,

Э гэриш эл гүьлом  
мереш гьисд войгей дуьл:  
Хосденуьм омборте  
веровгу гьуьзуьргуьл.

### **ТЭГРИФИ ДЕВР**

Рэхь вокурдет э эвр гьово,  
Жевлон зере рузгьо-шевгьо.  
Астарагьой ковре асму,  
Тегьер гьунши бирет изму.

Гьэнетсуьзе гьуш пулати,  
Жофой желде хэлгь Совети,  
Э эл гүьлом нишон бурмунд  
Ве э космос рэхьэ вокурд.

Гэил ве пир, гьозор милет,  
Гьемме хэлгьгьо тэгриф дорет  
Кук партией эн Ленине,  
Игид хэлги—Гагарине.

Космонавтгьо—тэгрифи девр,  
Игидгьойму меравт звер.  
Миёв у руз э Венера,  
Инсон мерав э углэре.

### **ЭРИ ПОЧТАЛЬОН**

Дуре хэбер, нике хэбер,  
Е эз дигьбон, е эз шегьер,  
Овурдени эри инсон,  
Дервойкуйму, почтальон.

Севгили ме э дур гьисди  
Те оmore когъоз дусди,  
Мибисдорум ме нигоре,  
Почтальон те оmore.

Э душ пуре тогъор вери,  
Мидируьмге у оmoreи,  
Те гъопуре у вокурде,  
Мирафдуьм куьнд эй вохурде.

Тегьер суьгъде дусд ве мирос  
Овурдегор гозит, когъоз  
Гьисд эриму почтальон,  
Хьэрмэхь эн пир ве эн жовон.

### СУЬМБУЬЛ

Э ранг эн суьрх, зерде хьини,  
Селигъэлуь э бенд дери.  
Гьечуь веди бире суьмбуьл,  
Буле мэхьсуьл, шори эн дуьл.

Чуьн бикегъо лой-лум доре,  
Кими вэхд лос зими бире,  
Е вэхдиге туь мивини,  
Э сер дерьёгъ шар гешдени.

Э эшгъэвоз кук, комбайнер,  
Мэгъни муьгъбет хунде эй ёр,  
Комбайн энуге, тегьер геми,  
Дурундени мэхьсуьл гьони.

Диренге ме бул гендуьме,  
Воисдени тэгъриф дуьм ме:  
Жофокешгъой дигъбонире,  
Сэхъиб були, хушбэхдире.

## БОВОР СОХДЕНУЪМ

У руз, кейки чум вокурде  
Э и дуьньёгь дениширем,  
Гьеммишелуьг дусди бесде,  
Инсонгьоре бирор гирдем.

Эз гIэили бовор сохдем  
Э ишму ме, одомигьо,  
Дануьсденуьм гьэрхунд бирем  
Эй вегирде тербиегьо.

Бовор сохденуьм э усдогьо,  
Комигьоки вокурденуьт,  
Э шофёргьо ве лётчикгьо,  
Комигьоки э рэхь деруьт.

Бовор сохденуьм э духдиргьо,  
Сохденуьтгьо дур гIэзоре.  
Э солдатгьой эн серхьэдгьо,  
Дошденуьтгьо динжимуре.

Э ишму ме боворинуьм,  
Ишмуш э ме бовор сохит.  
Эй инсонгьо ме хосденуьм,  
Дуь-екире омбар хогьит.

## ХЭГЬЕР

Э чодур пичире,  
          мигуьрди туь ешмэгь,  
Сифетиш пэхьни бу,  
          веди бу чум энжэгь.  
Муьгьбет дуьл духдери,  
          э гьечу бу пэхьни,  
Э гIэрей инсонгьо—  
          инсон нисд зен егIни.

Дохьоргъо ве догъгъо  
чутьам лол бируьтге.  
Зенгъош ки ужире  
эжжэгъ бэхд диретге,  
Палаше гIэрс зенгъо  
пур мисохд чойгъоре,  
Пэхьники мигешдуьт  
эй дердгъо чорере.

Чуьтаме дуьл иму  
несоху шорире?  
Чуьтаме эшгъ небу,  
эй хунде шогъире?  
Э гъэриш син-богъи  
гуьзеле улкейму,  
Э тегьер буьлдуьрчин,  
хунденуьм ме изму.

Ни бесдуьт, ни духут  
де лэгIэй шогъире.  
Пэхьники ни дуьздуьт  
духдергъой догъире.  
Бегем гъич муьгъбете  
дуьдире мидануьт?  
Муьгъбете ээ гъэд дуьл  
векенде нидануьт.

Имуьгъой, жон хэгьер,  
сохденуьм ме шори.  
Туь гъисди ударник,  
ме гъисдуьм зен—шогъир.  
Имуре войгеи,  
у войге нисд пэхьни:  
Хушбэхде рузгъойму  
пур бугу сес мэгни.

## ИГИДГЪОЙ ЖОФО

Гаганова нишон бурмунд,  
Рафде э пес мунде десде.  
Бугеш коргъой десде гурунд,  
Сер гуьрд уреш пушо берде.  
Гьинор эни зен совети,  
Венгесд э дуьл миллионгъо эшгъ  
Эн тозе девр у чигьрети.  
Э биёвгъо дорени шевгъ.  
Изму э гьер кунъж эн улкё  
Миофи туь уре хуно.  
Поисденуьт э е жерге  
Желде кукгъо ве духдергъо.  
Кумег бире эй еки,  
Угъо берде коре пушо,  
Эй энугъо гьонун-ники  
Гьисди гьони игид жофо.  
Э Догъистуш е ченд садгъо,  
Авар, лезги, даргин, татгъо,  
Тегьер желде Гаганова:  
Кор сохденуьт тозе жире.  
Войгей иму гьисд шолуми,  
Шорте рузгъо овурдеи,  
Войгей иму гене уни:  
Девр коммунизм вокурдеи.

## ГІЭТЛУЬЙ ДЕВР ИМУ

Э догъгъойму небу гідот,  
Зенгъо эз мерд жоборд бошут,  
Вожей гідсбе, тегьер гідтлуть,  
Э дес гуьрде, зонгу зенуьт.

Мисохдут гідэйб ве биёбур:  
«Зен эз мейду биё бу дур».

Э кул глэсб нэгл, э кул эн хэр  
Глэруьс беднум мегошд, хэгьер.

Имугьойле диренуьм ме,  
Зенгьо азад бирет гьемме.  
Глэсб пулати ве гьуш гьово,  
Э дес зенгьо деруьт угьо.

Эдей жесде, эдей жесде,  
Тегьер эн гьуш зу паруьсде,  
Пура мошин, гуйге пари  
Эдей берде юк э дури.

Назушменде дес эн Лиде,  
Руль машине муьхькем гуьрде,  
Коммунизма эй вокурде,  
Гьер жире юк эдей берде.

# ПОЭМА





## ДУХДЕР ДУЪ БЕБЕ

Э гуъзет 60 сали комсомл

### 1

Нувуьсденуьм ме дестоне  
Эри Мозол—духдер тати,  
Кумег бире эй хэлгь хуьшде,  
Гьинорменди у бирмунди.

Гуъзеле мегь, э мегь гьоми,  
Емуьшдоргьо геймиш гьисди,  
Онгурбоггьо савзе мохбер,  
Дуъл инсоне сохдембу шор.

Жофокеше фэхьлей колхоз  
Э хъвесевоз коре мисохд.  
Эй вегирде буле бегьер,  
Зиндегуни варав звер.

Лап мозолменд бу жовонгьо,  
Шоре мэгьни хунде угьо,  
Рафдембируьт десде-десде,  
Эз кучегьо эри гешде.

Э булутгъо пичи гъово,  
Э дерд офдо гъемме хэлгъгъо.  
Фашист, немцгъо-довглохогъгъо,  
Э сер Ватан гъов кенд омо.

Рафденуът жовонгъо э довгlo,  
Жейле бисдо соймишигъо.  
У рузгъо гъич эз ёр нирав,  
Игидгъо э торих мерав.

Гъэдимие шегъер Дербенд  
Кукгъой юре э женг фуърсо  
Нисд бу гугре беде дуьшмен,  
Азад зигъуът гъеме хэлгъгъо.

Жофокешгъой шегъер Дербенд  
Деш хъэвеслуь коре сохдуът,  
Эй гъэзизигъо бире кумег,  
Дуьшменгъоре зу бесгъун дуът.

Э гурунде беде рузгъо  
Э пушо бу комсомолгъо,  
Расде шовгlo угъо доре,  
Борж мибердуът э гъер жиге.

Э жергегъой комсомолгъо  
Дебу духдер—нум ю Мозол.  
Бебей энупафд э гъовхо  
Э суьфдеи рузгъой довгlo.

Гъе эз у руз тегъер жоборд,  
Сер гирд жофо кеши Мозол.  
У комсомол Ленини бу,  
Э пушой эл шовгloлуь бу.

Медсестра э госпиталь,  
Э яралуьгъо тегъер хъгъер,

Шев те себэхь не хисире,  
Сохдембу у кумекире.

Не кешуьтгу угьо зэхьмет,  
Зу соф бире, бурав э женг.  
Бигьил куьнд бу руз бесгъуни,  
Дуьшмен Ватан нисд бирени.

## 2

Мозол эз кор вогошдеки,  
Пушоре гирд дусд школеи,  
Хунденбургьо э уревоз,  
Э е школе эз зуревоз.

— Мозол, туьре эдем гешде,  
Эй винире пушой рафде,  
Эдем рафде ме э довгло,  
Кумек бире эй бебегьо,  
Дуьшменгьоре эй нисд сохде,  
Шолумире эй овурде.

Гоф Яшкере гьетте шинре,  
Сифет Мозол зерди зере.  
Дуьл ю варафд-фураморе  
Гуфди, дусде у дуьл доре.

— У мердини, э женг рафде,  
Дуьшменгьоре эй нисд сохде.

Песде Яшке сер тик гуьрде,  
Гуфди метлеб дуьл хуьшдере.  
— Минет мени, дениш э ме,  
Туьни вихде соймиши ме.  
Гоф ди мере пушой рафде,  
Э гьер рэхьгьо инсон рафде,  
Эгер не буриге глов эз беидгьо,  
Мирасуьт э мирод муьгьбетлуьгьо.

— Бура, рэхь ник, шор биёвош,—  
Гуфди Мозол, дир не сохде  
— Бисдоримге гьисмет еки  
Миёв эйму рузгьой ники.

— Бебейму гьисд э довго,—  
Мугу Яшке, минет сохде,  
— Дедейму мунди тэхьно,  
Э хунейму де кес неде,  
Хосденуьм эз туь, Мозол, дусд ме,  
Глэре-бир сер кеш э дедейме.

— Яшке, дусд ме, бовор сох туь,  
Тегьер ферзенд эй дедешму,  
Ме мибошум, олхоин бош,  
Бесгъундоре, зу вогошдош.

### 3

Чуьлдуймуьн сал, гьизгьин довго.  
Миоморуьт эшелонгьо,  
Э Дербенд яралуьгьо  
Лап пур бируьт госпиталгьо.

Мозол шевгьо не хисире,  
Не вомунде кор сохдембу.  
Бесдембу у яралуьгьоре,  
Оммо эз дуьл гирисдембу.

Эз же омо и бедигьо  
Э сер келе ве жовонгьо.  
У кор мисохд гуьм-гуьм сохде,  
Эй сук сохде дорд яраре.

Е яралуь себэхьмунде  
Огол зере глов хосдени,

Сер энуре тик вегирде,  
Мозол глове декирдени.

Согъ сифет ю бу пичире  
Э верфлуье сипре жоне,  
Энжэгъ ловгьо веди бируът,  
Тегьер тешне глов фубердуът.

Диеш дердлуь Мозол бисдо,  
Дугълей эн глэрс эз чум офдо,  
Генеш у дуьл хуьшдере до,  
Эй яралуь кумек бисдо.

Хэйли рузгьо гиросдени,  
У яралуь сер гирдени,  
Евош-евош эй бире соф,  
Дуьл эн Мозол бирени шор.

Яралуь чум вокурденге,  
Э сифет Мозол сэхд дениши,  
Эз зуревоз мигуиге  
У Мозоле шинохдени.

Сер гирд э ёр эй овурде  
Эже дири у Мозоле.  
Бирден э ёр энү омо,  
У гурунде беде гьовхо,  
Эз ёр фурмуш гьич нибугьо,  
Дусд ю жуне норевугьо,

4

- 4) Пуч сохдембу инсонгьоре.
- 3) Сухундембу хунегьоре,
- 2) Гье шишире оморембу,
- 1) Увэхди дуьшме гужлуь бу,

Эй Таганрог келе гъовхо,  
Лап хунлuye гиpошдебy,  
Ферзендгъой эн ченд миллетгъо,  
Тегьер эн мерд женг бердембу.

Дусде хъовир эн Николай,  
Нисон—ферзенд Догъистони,  
Э е жерге гъовхо берди,  
Дуь согъэ сал, бирор бири.

Э Таганрог женг бу келе,  
Беде яралуь Нисон бисдо,  
Коле уре гъужогъ зере,  
Зу ведеберд эз гъэд гъовхо.

Увэхд Нисон суьсд гъолок бу,  
Эй гоф сохде муьгълет небу,  
Э гъултугъ у десе доно,  
Сирот вегирд э Коле до.

Энжэгъ дуь гоф увэхд гуфди:  
«Шегьер Дербенд э Догъисту...»  
Коле уре дуз вараси,  
Шовгlo доре, дусде, мугу:

«Олхоин бош, гъэзизе дусд,  
Согъ мундумге, ёгъин миpам,  
Эз жун меш уре дуьруьсд,  
Тегьер бебе ме мидорум».

Коле дусде гъовре сохде,  
Э гъоврей эн бирори,  
Дарафд э женг эй борж берде,  
Гъэгър хун эн дусд э дуьл дери.

Нетерсире у эз гъэжел,  
Телеф мисохд дуьшменгъоре,

Э лап беде жигей эн женг,  
Дешендембу у хуьшдере.

У руз угьо сэхд поисде,  
Таганроге гьэлхэнд дошдуьт,  
Энжэгь буйругь оморенге,  
Песо угьо вогошденуьт.

Немцгьо гьеле гужлуь бируьт.  
Те Кавказиш расиренуьт,  
Оммо Коле у сироте  
Э гьултугь ю глээиз дошде.

Глэре-глэре вегирдембу,  
Тимор сохде, гирисдембу,  
Э ёр дусде у овурде,  
Эй ю глэрсгьо рихундембу.

Э хоригьой догьгьой Кавказ,  
Э беде женг дери е дес  
Коле бисдо сэхд яралуь,  
Эз хуьшде уре хзбер небу.

Э госпиталь шегьер Дербенд,  
У э хуьшде дироморе,  
Вохурд э ю куьнде чигьрет,  
Гье у туйтем огол зере,  
Эз сестра пуьрсирени,  
Мундиге согь когьозгьой ю,  
Зури овурде гьишдени,  
Тигьэт вини сироте у.

Коле увэхд ёгьин дануьсд,  
Нисон бебей эн Мозоли.  
Дуьл ю бисдо диеш гурунд,  
Эз чумгьош глэрс бисдо тигьи.

Оммо фикир, дерд дуъл юре,  
Недануьсд очмиш сохде.  
Воисд уре зу соф бире,  
Гъэгър хун дусде ведешенде.

Мэглумсуюз вэхд пушо рафде,  
Сер гирд Коле эй соф бире.  
Глэре-глэре у вэхуьшде,  
Минуьшд э сер эн пенжере.

Гьетте Мозол дироморе,  
У мибисдо диеш гъэмлуй,  
Э дуъл дегьо фикиргьоре,  
Воисдембу очмиш соху.

Оммо гьичиш не гуфдире,  
Мигуфди у э дуъл хуьшде:  
«Беге мибу и чумгьоре,  
Рэхьм не берде, глэрслуй сохде».

Не дануьсде бигьил зигуьь,  
Чумгьо эз глэрс тар не бошу.  
Раче жейрон эн догъире,  
Гловуни эй гъэмлуй сохде.

Е руз Мозол э кор омо,  
Гъэмлуй бируьт зну чумгьо,  
Веди бу, ки уре дерд бу.  
Сифет зну бу фикирлуй.

Коле пуьрси эзу зури,  
Эйчуь гьечи у гъэмлуйни.

«Лелей Коле ченде гуюм,  
Ме э кифлет е тэхьноюм.  
Э дуъл ме ченд дердгьо дери,  
Одохлуй ме э довглой,

Вегирдем ди когъоз эз у,  
Бири гуфре сэхд яралуь.»

Эз чум ю глэрс тигъи бире,  
Зиёд сохде Мозол гуфди:  
«Дие бебеш нисди мере  
Э женг довгло уш ки муьрди».

Инжо лерзи жендек Коле  
Ве пуьрси у дир не сохде:  
— Чутьам муьрди эн туь бебе,  
Эз же эхи туь дануьсде.

— Омори когъоз пуч биреи,  
Мэглумсуйзи, гъовреш нисди.

Де тоб недо инжо Коле,  
Вегирд эз гьултугъ сироте.  
Дениши у э сиротиш,  
Э глэрсгьой чумгьой эн Мозолиш,  
Эз чумгьой мерд тэхьле глэрсгьо,  
Э инжиге тигъи бисдо.

До э духдер у сироте,  
Ихдилот сохд гъозиере:

—Тегьер игид Нисон дусд ме,  
Э гъэд гъовхо нори жуне  
Э Таганрог гъовре бири,  
У э гъоврей эн бирори.  
Дуьл ди хуьшдере, духдер ме,  
Бигьил ебо соф бшум ме,  
Мирам э женг дир не сохде,  
Гъэьре эри ведешенде.

Ме эз довгло мивогошдуьм,  
Эй туь бебе ме мибошум,

Бесгун доре вэхшигьоре,  
Мисохим селт нисд угьоре.

Одохлуйтуьш мивогошду  
Диеш шорте рузгьо мибу.

Оммо Коле хэберсуьз бу,  
Эй довгlo глэмели небу.

Гьеммишелуьг беде яра,  
Овурд эй ю шуькестире,  
Духдиргьо дуьл дорембируьт,  
Суре э у нигуфдируьт.

Оммо пушой селт соф бире,  
Дануьсд Коле ёгьинире,  
Инжо бисдо у фикирлуь,  
Недануьсд у де чуй соху.

Минет мисохд э духдиргьо,  
Э женг рафде бигьилуь угьо,  
Мерг венгенуь э дуьшмегьо,  
Гъэгр эн дуьле ведешенде.

Нэгл, не гьишдуьт уре рафде,  
Глэмели небу эй женг сохде.  
Нуьшдембу сер гьуз гирде,  
Глэре недоре , гьэм кешире.

Мозол уре гьечи дире,  
Гуфдирени: «Лелей Коле,  
Эйчуй гьечи фикирлуьнит,  
Могьбул, сергьуз гье нуьшденит?»  
Э ён Мозол у куьнд нуьшде,  
Ихдилот сохд гьозиере,  
Э и довгlo селт нисд бирет,  
Эн Николай согъэ кифлет.

Э дуре дигь Украины,  
Суьфде бомбгьо офдореки,  
Темиз бири эз руй хори,  
Уре екиш де не мунди.

Бебе ве дедей ю муьрдет,  
Зен ве кукеш немцгьо куьшдет,  
Гьони нисди уре кифлет,  
Эже бурав, нисди муьгьлет.

Мозол тигьэт денишире,  
Гуфди: «Месох фикир леле,  
Пой туь инжо эй зигьисде,  
Э жигей бебе эй ме бире.»

Коле бегьем соф не бире,  
Мозол уре берд э хуне,  
Мидениши тигьэт э у,  
Нигьишд уре фикилуь бу.

Коле дуьл ю лап битоб бу,  
Э кор рафде воисдембу.  
Зури офде фенд эн коре,  
Сер гирд жофо эй кешире.

Э колхоз у дарафдени,  
Тегьер жоборд кор сохдени,  
Жигей Нисон дусд хуьшдеде,  
Гирдени у желдлуь бире.

Э госпиталь кор омбар бу,  
Мозол эз кор дир миомо,  
Коле зуте оморембу,  
Чой, хурекиш у мивено.

Чуьш эй сохде у хьозур бу,  
Токи Мозол дердлуь небу,

Оммо Мозол гъэгъри бире,  
Нигъишд сохде кор хунере.

Е руз Коле эз кор омо,  
Зен эн гъунши когъозе до,  
Вегирденге когъозе у,  
Шори юре гъэдер небу.

Зури хурек хьозур сохде,  
Суьфрере у дешендени,  
Э пушой гъопу у рач нуьшде,  
Мозоле гузет сохдени.

Гъетте Мозол куьнд оmore,  
Гуфдирени зури Коле:  
—Гъери вежегъ е дес винуьм,  
Шоре хэбер туьре мидуьм.

—Лелей Коле, гу зу бура,  
Чуь хэбер туь миди мере?

—Гъевел вежегъ, пезде гуюм,  
Мереш воисдени винуьм,  
Чуьтаре туь вежегъисдеге,  
Шоре хэбер оморенге.

Чумгъой Мозол гъэрслуь бире,  
Гуфди у: «Жон лелей Коле,  
И ченд салгъо не вежесдем,  
Тегъер юреш фурмуш сохдем...»

«Нэги, духдер ме, туь межегъи  
Эз шори Яшке соф биреи,  
Одохлуйтуь селт соф бире.  
Гене эдей гъовхо берде».

Дуъл эн Мозол лап шор бисдо,  
Когъозе у ченд гиле хунд,  
Белки гьисди уреш бэхд ю,  
Мивогошду одохлуй ю.

Гээзизе кукгьой Ватан,  
Бесгун доруът дуьшменгьоре,  
Гьовхо берде тегьер аслан,  
Овурденуът азадире.

Э жергей эн жобордгьо,  
Кук Дербенди Яшкеш дебу,  
Э лулей эн гуьрге-вэхьшгьо,  
Угьо суре донорebu.

Зу лов бисдо хэбер шори,  
Э Дербендиш омо раси,  
Э игидгьо эй вохурде,  
Гьемме эдет хьозур бире.

Э у глэре бебе-духдер,  
Гьэдерсуьз бире дуьлшор,  
Коле ферзенд украини,  
Мозол духдер эн татини.

Тегьер мигид хунегьоре  
У руз Мозол вараюнде,  
Гьуле э гьул бебе доно,  
Э вокзол Дербенд фурамо.

Бируът инжо согъэ жэгмет,  
Ченд десдегьо зерегоргьо,  
Геймиш бируът тегьер хэлглат,  
Оморембу сес гьовогьо.

Мивежесдуът гьуле гирде,  
Гьэдер небу шори хэлгъэ,

Поезд э вокзол диромо,  
Игидгьо э перрон фурамо.

Дуь-екире гъэл мигирдуът,  
ГӀэрсгьой шори мирихундуът.  
Яшке зури фураморе,  
Офдени у ёр хуьшдере.

Гъэл гирд ёре эз дуьли у,  
Сэхд моч сохде эз ловгьой ю,  
У бу суьфдеи моч эн муьгьбет,  
У бу васал зиндегуни,  
Эз четини гиросше бэхд,  
Лап ширин бу эй дуьл гьони.

Муьгьбетлутьгьо жейле бире,  
Томоше сохд дуь-екире,  
Мозол гирде дес Яшкере,  
Шинох сохд у не Колере.

Гьерсе еки гьул доноре,  
Варафденуът э лой хуне.  
Зури кура бисдо дусдгьо,  
Хэгьер-бирор ве шинохгьо.

Э сер суьфрей келе ники,  
Нуьшденуът дусдгьо гьеммееки,  
Пейлей шори декирденуът,  
Э согьи еки рач хурденуът.



## СЕРНОМЕ

<b>Стихигьо</b>	
Учитель . . . . .	4
Астарейме . . . . .	5
Инсонгьо . . . . .	6
Э сер гьоврегой Пискарев э Ленин- град . . . . .	6
Нис воисде мере дие . . . . .	7
Шекуьл бебе . . . . .	8
«Духдер догъум...» . . . . .	10
Несиглэт деде . . . . .	10
Биренуьт бебегьош . . . . .	11
О, Ватанме! . . . . .	15
Глэзизе партия . . . . .	16
Шегьер Ленин . . . . .	16
Дор э сер билогъ . . . . .	17
Э сер гьоврей деде . . . . .	18
Хогъ Ватане . . . . .	18
Нисе муьрде . . . . .	19
Ловой деде . . . . .	19
Вэхд жовони . . . . .	20
Мере хьэз оmore . . . . .	21
Дусд . . . . .	22
Шей себэхьи . . . . .	22
Васал э догъгьо . . . . .	23
Фурмуш нисе сохде . . . . .	23
Гъисмет духдер . . . . .	24
О, дедей . . . . .	26
Пешмуни . . . . .	27
Эри Дербенд . . . . .	27
Зимисду не васал . . . . .	28

Гээзизе хориме . . . . .	29
Гэруьс уруси . . . . .	29
Войгей дуьл . . . . .	32
Тэгрифи девр . . . . .	33
Эри почтаьон . . . . .	33
Суьмбуьл . . . . .	34
Бовор сохденуьм . . . . .	35
Хэгер . . . . .	35
<b>Поэма</b>	
Духдер дуь бебе . . . . .	40

Для среднего и старшего школьного возраста

**Зоя Семендуева**

**УЧИТЕЛЬ**

на татском языке

Редактор	Художественный редактор
Б. Сафанов	Е. Омельченко
Художник	Технический редактор
Т. Сулейманов	А. Масандилова
Корректор	
А. Семендуев	

Сдано в набор 26.03.81. Подписано в печать 15.06.81.  
Формат 70×90<sup>1</sup>/<sub>32</sub>. Бум. типогр. № 1. Журнально-рубленая  
гарнитура. Печать высокая. Усл. п. л. 2,05. Уч.-изд. л. 2,16.  
Тираж 1000. Зак. № 316. Цена 10 к.

Дагестанское учебно-педагогическое издательство Гос-  
комиздата ДАССР, Махачкала, ул. Маркова, 32

Типография им. С. М. Кирова Госкомиздата ДАССР,  
Махачкала, ул. Маркова, 51.

ГЪЭЛЕТН

Стр.	Нуьвуйеде омори э зофриуи чорриз	Хунде герки
44	Пуч сохдембу инсонгьоре. Сухундембу хунегьоре, Гье шишире оморембу, Увэхди дуьшме гужлуй бу,	Увэхди дуьшме гужлуй бу, Гье шишире оморембу, Сухундембу хунегьоре, Пуч сохдембу инсонгьоре.

Цена 10 коп.

**УЧИТЕЛЬ**

**Татский язык**